



Sabtu, 11 September 2021

Ogen: 2 Timotius 4:1-5



PEMBARKENLAH BERITA E



Kegeluhén idoni enda mbelin perkembangenna, la siarap ibas piga-piga tahun perpudi enda luar biasa pedasna berubah. Cara nggeluh ras kerina perlengkapén sindukung kegeluhén enda. Sienda tentuna erkiteken kepentaren manusia si ndatken erbage-bage pemeteuh ras teknologi. Adi siinget nai ituriken ibas Pustaka Si Badia Yesus bagepe rasul-rasul nehken berita keleng ate ras keselamatan e alu lawes ku kuta-kuta. Bagepe misionaris reh dingén meritaken keselamatan e nadingken kuta ras inganna. Tapi genduari enggo tambah cara erberita si meriah e.

Ibas renungenta enda Rasul Paulus nehken pedahna man Timotius guna tetap erberita kerna berita keselamatan. Sabab perkembangan jaman ras pemeteuh manusia, enggo lit kalak si lanai merincuh megiken berita e. Enggo rinciuhén ia ngaloken berita sideban amin la maba keselamatan tapi meriah akapna. Emaka ipersingeti Paulus si Timotius nina, tetap beritaken subuk tengteng la tengteng paksana. Ula ngadi erberitintah kai gia jadi, sabab labo menukah ndahiken dahin berita simeriah banci saja turah kiniseran, igombangi kalak ntahpe la ka idiate kalak sideban. Tapi perlu siinget maka kata Dibata so peséh kita e labo mulih alu sia-sia (Jes. 55:11)

Ibas perkembangenna kerina media banci ipake guna alat erberita, teknologi memotong jarak ras waktu, materi bagepe tenaga, salah sada alat si banci ipake guna erberita eme radio, nehken berita si meriah arah siarena. Emaka ijapa pe banci ialoken berita keleng ate Dibata e. Tanggal 11 September eme wari radio Indonesia, wari e ibenaken ibas tahun 1945, kenca Indonesia merdeka, iakap maka radio banci jadi alat guna mbangun kiniersadan ras jadi alat komunikasi antara pemerintah ras rakyat. Bageme pentingna komunikasi ras alatna. Janah alat komunikasi enda pe mbelin nampati nehken berita si meriah man kerina manusia.

